

秘史叢刻

四王合傳

逸史氏著

吳三桂傳

吳三桂。字長白。遼東籍高郵人。提督京營吳襄子也。幼試武舉。出華亭董宗伯其昌之門。以父廢得官。歷都督指揮。積勳至大總戎。崇禎十四年。薊遼總督洪承疇出山海關。會八鎮兵於寧遠。三桂偕王樸馬科楊國柱等與

清兵戰於松山關。國柱敗沒。三桂與樸等俱夜遁。樸被誅。而三桂僅鐫秩。未幾奉命鎮守寧遠。三桂年方及壯。勇冠三軍。北門鎖鑰。藉以無恐。十七年春。闖賊李自成。由晉入燕。漸逼京師。給事中吳麟徵。疏請棄關

外邊地。速召三桂入衛。陝督朱應桂。亦上言。闖賊勢大。非全力注之。不可。請調關東吳三桂及天下雄鎮。會師真保之間。併力協剿。庶賊可滅。廷議以棄地非策。疏請不及。三月自成破陽和。賊將破真定。京師戒嚴。始從麟徵棄寧遠。封三桂平西伯。飛檄令入關東討賊。三桂被命。遷延不卽發。簡閱步騎。攜挈人民。徙五十萬衆。日行數十里。六日次山海關。而昌平陷矣。二十日抵豐潤。而都城陷矣。三桂聞變。回至關門。頓兵不進。猶豫未有所決。自成聞三桂回師據關。執其父襄。令作書招之。畧曰。汝以君恩特簡。得專闖任。非真累戰功。歷深資也。今汝徒節軍容。怯懦觀望。使李兵長驅直入。既無批吭搗虛之謀。復乏形格勢禁之力。事機已去。天命難回。我君已逝。爾父幸存。嗚呼。識時務。亦可以知變計矣。今

及蚤降。不失通侯之賞。猶全孝子之名。萬一徒恃憤驕。全無節制。主客之勢既殊。衆寡之形不敵。頓甲堅城。一朝殲盡。使爾父無辜。並受屠戮。身名俱喪。臣子俱虧。不大可痛哉。遣降將唐通。資銀四萬犒師。并裹手書以往。而別令賊。率兵二萬守關。拒三桂。三桂得書欲降。爲書覆父。有國破君亡。兒自當以死報。今我父諄諄以孝字督責。兒自又不得不勉遵嚴命等語。適有愛妾陳沅在襄所。爲自成奪去。三桂詢知大憤。乃遣使乞降於清。求兵討賊。時 九王統兵十餘萬。四向以觀動靜。總督洪承疇及三桂舅祖大壽。皆在 清朝親信用事。求發兵助中國。三桂又自潛詣大營。承疇大壽即引見 九王。遂定盟起師。先是三桂作受賊犒師銀。而襲殺其守關兵殆盡。賊帥負傷遁歸。至是傳檄遠近。畧云闖

賊李自成。以么麼小醜。蕩穢神京。日色無光。妖氣吐焰。豺狼突于城關。犬豕踞於朝廷。又云弑我帝后。刑我縉紳。戮我士民。掠我財物。二祖列宗之怨恫。天壽凄風。元勳懿戚之誅鋤。鬼門泣血。又云周命未改。漢德可思。誠志所孚。順能充逆。義兵所向。一以當千。試看赤縣歸心。仍是朱家之正統。自成聞之大驚。自率兵六萬。東行。以禦三桂。挾太子二王。吳襄自隨。僞將劉宗敏。李過等。皆從。前鋒至永平。三桂遇之。十三戰無勝負。及自成大隊至。薄三桂營。拔之。至圍山海城數匝。復分兵從關西一片石出口。東突外城。逼關內。三桂不能敵。九王度勢已急。統大兵馳至。英王率二萬騎。從西水關入。三桂見九王薙髮稱臣。令關內兵悉薙髮。迫于戰期。兵不及薙者。裂白布一條。纏縛於身。以爲別。九王